

## 絕峰嶺

雲霧遮天，伸手看無景緻，心驚  
膽嚇，你一步一步  
一伐一伐勻勻仔踏，跔馬步  
赤手空拳，行向茫茫渺渺  
毋知甲子的未知世界  
一个無張持，獵鴉展翅對頭頂飛過  
用伊雄介介刺夯夯的屈勢  
一个失注意，烏熊親像石柱  
無聲無說釘佇離你十步遠的斷崖

其實，運命並無遐爾落衰，你聽  
夜蟲啾啾，親像一首繼一首  
天然小夜曲，為孤單稀微伴奏  
淡薄仔安慰，寒星躑出雲幕  
探頭吐一下仔大氣，今暗又是  
寂寞月光暝

彼暝，山風堅凍  
Gàn 死濟濟毋肯投降的細胞  
薄厘絲的衫褲直直畏寒，零下五度  
空虛的腹肚不時枵飢失頓，滿山遍野  
自然野菜無邊生炭，一目 nih  
成做救苦救難的救命仙丹，這帖藥方  
連山珍海味嘛綴袂著陣

有影，干焦食飽穿燒的記持，的確  
綴袂著陣，你逐日山林野地走跳  
綁鉛片練武藝，佇孤岩絕壁 peh 懸  
Peh 低，一時失覺察，跋甲太空  
細裂，倚起來尻川拌拌咧  
翻頭演練無全拳路，了後  
共傷痕準做光榮印記  
堅疤閣再堅疤，是英勇武士  
獨一無二的戰鬥詩

彼晡，暴雨強猛，袂輸  
虎龍豹彪橫行霸道，塗石流  
掠狂起呸面，將規粒山頭  
穩在在的地基，舞甲倒籬顛斗  
你共目屎掰掉，偷偷仔擎手 ñg  
擲沙挑掘希望，掘啊掘  
掘著一堆死人骨頭，雄雄智覺  
鏡花水月繁華攏是夢

是啦，拍斷手骨倒頭勇，假使  
失敗是成長的加持，碰壁  
顛倒鍛鍊鋼鐵的意志，若按呢  
笑容穩當堅持的春天，哈哈  
功夫萬底深坑，毋通數想  
一步千里，講甲你捌  
喙鬚早就拍死結

風靜雨停，  
    彩虹現身，  
        雲霧四散，  
            紅霞滿天，  
                星光月圓，  
                    日頭杳杳仔  
                        浮  
                        上  
                        山

你踮絕峰嶺頂，看盡天機  
千變萬化，體會世情  
冷暖，修練生命哲學  
平凡遊戲人間，有閒  
無閒學藝愛頂真

——2014.7.28 寫佇台南大學圖書館  
2015.4 《台文戰線》第 38 號